

邵陽縣志

邵陽縣志卷九

人物中 懿行

夫夜光匿影而自照叢蘭在幽而自芳實之所往名必歸之若其寸累
銖重微長足探儲登於簡以詔方來作懿行傳 宋金彥力學善屬文
喜振貧窶時號義門詔舉天下孝廉第一胡寅記其事 蕭文蔚進士
慶元二年與蕭楹出私錢修復舊學楊萬里爲之記楹進士官柳州巡
轄族人藻偕子德一修康濟廟藻進士德一耒陽主簿 李純忠進士
知端州清介慕義嘗出私錢五十萬修邵州學縣人王元春有記 明
陳大德歲歉恆首輸糶事祖母謝母劉甚孝事世父如其父少孤撫兩
弟有恩弟長謀析居大德曰古人九世同居豈吾不友耶泣下兩弟亦

泣下遂止 曾璿少喪父母偕從兄弟居始終無間慕張公藝之爲人書忍字碑示子孫從兄某性忿狷璿善下之子廷俊克繼父志四世同爨又有范約者五世不析居並雍睦可風 曾友銘有文名縣令何永芳重之先是寶慶輸賦至京經三百里灘舟多溺永芳謀改折色友銘曰此百世利也獨詣行臺省陳之大吏下之縣永芳因條上利害遂如議至今賴之予志暹年十七時以歲旱出粟千六百石置義倉助官振濟以義民徵赴闕賜冠帶歸作敕書樓修撰劉儼爲之記暹子景翳繼掌其事出入均正加義官給冠帶家故以賢雄喜造津梁修道途不失家風 陳經事繼母孝兄弟五人同居諸器物皆以竄敗自給鄉里重之 王暹素行端謹兄道早喪事寡嫂甚恭教養兄子鑑逾己子鄉人

貧不能婚葬者助之 段彬兄弟皆早死撫諸遺孤成立鄰里有爭恆
婉諭之喜施與有司給冠帶卒年八十五里人社祀之 苑宗廷兄子
三歲失母宗廷撫成之族人貧乏者資使就學舉鄉飲賓又歐陽浩儀
亦以孝友聞 鄒杰廩生兄木林森三人宦遊以父母在獨絕意仕進
曲承厥歡已諸兄先後引退終養孝友一門極天倫之樂云 羅逢陽
益陽兄弟皆諸生早孤篤友愛起止無須臾離後兄暴卒適弟他出歸
大慟卽日卒 尹代鵠與弟代鵠代鶴篤友愛既析居相距十數里乃
度其中青獅峯營精舍時聚首人比之花萼樓峯麓有欒木橋支獨木
過者股栗爲輸金易之石今環橋十餘里居者率爲其子孫焉鵠子興
契好施與當事給壽官 伍寶備力養母恆菑食衣無完絮主者遺之

綿或酒食輒以遺母母疾禱天請代及卒水漿不入口者數日鄉人伍
蘭予之棺乃請役於蘭畫傭工夜返哭慕蘭義不受傭泣曰幸藉恩得
掩遺骸不償值母不瞑目矣且得朝夕母墓乃至願也工畢環墓哭盡
哀去不知所往見三楚文獻錄 王朝卿貢生任江油訓導父失明朝
卿乞歸養不允挂冠去百計求醫既父目復明大吏表其門曰孝思堂
以原官起用年八十餘卒祀鄉賢子仁爲刻效烏集 羅文盛母喪未
葬會賊至疑棺有金將剖之文盛伏棺號哭刺以刃不動哭愈哀賊憫
其孝舍去 鄒念諸生母歿將葬會大風雨役夫皆走念號痛以身伏
棺達旦竟以病亡 羅才賓初家路源村悉廬產讓弟自闢汀里長洲
居之嘉靖中李承賢倡亂羣盜入室寇攘才賓夷然盜相與語曰此善

人不可害遂去 唐伏貴素貧以里役給事大府子興仁成進士報至

方負戴歸授以冠帶不受司理楊廷蘭詢郡獄冤否伏貴舉二事脫巾

伏地指天日白之竟得平反 歐陽添聰築室清澗祠仲弟添鑑署重

慶府事遣吏迎之添聰曰我樂清潭久矣何必遠走爲太守兄耶卒葬

清潭人呼清潭先生

考歐陽添鑑中萬歷鄉試副榜官重慶同知署府篆卒官士民立去思碑

金歸其櫬舊志不載道光府志以添鑑兄添聰列

國朝隱逸稱添鑑以寓籍中進士官重慶太守而選舉

不載今據歐陽家譜更正以添鑑列選舉而以添聰列勝朝懿行

郭萬里幼常襲指揮不就

喜吟咏游佳山水遇古字畫購求不厭中年喪妻不再娶晚獨處一室

所陳惟茗香子弟奴婢罕見其面無疾卒 馬鎮瑞廉介爲當道重縣

有訟不決者官敦請至令隸抱牘隨詣城隍祠跪讀聽分曲直多悅服

以解歲歉官知其貧出義倉穀給之辭多受少曰所須止此爾 唐正垣厚重有識力母沒未葬有流寇數人將發其厝正垣自往哀之寇怒刺以刀正垣奪其刀屈而擲之寇驚去有江西士人遊邵貧不能歸爲賈田取婦 郭大勤給事刑曹見重長官有大獄悉諮之所全活甚多潰兵之亂大勤匿草莽中爲邏卒得熟視之驚曰此郭父乎設食贈衣遣之歸又有還遺金事 王大任安成人移家邵陽居於市有遠賈來寓遺金七十越數日復來大任笑曰何疏也舉原緘還之 歐陽景湖事親孝宏治間歲歉捐穀千餘石振濟一方當道表爲義民賜冠帶何永獬遠近橋路諸碑所載捐貲甚夥正德朝先後捐穀救荒歉計千二百石有奇旌義官李重珍萬歷時捐穀萬餘石備振時年七十守道金

學會請給壽官申大闡捐貲修石梁凡十一處臨沒屬子孫建宜春橋
嘉靖辛亥歲饑發粟數千石糜粥活衆事聞舉壽官謝朝闕出繼伯父
嗣歷事母五人曲盡誠敬姊無嗣迎養於家終其身嘗因歲歉捐穀三
百石充賑守道詳請給冠帶旌其門曰耆德又趙懋易每遇荒爲糜粥
以食飢人 曾大東家富萬歷中大饑謁推官楊廷蘭請以所藏賑饑民
分守道金學會單騎往遺屬吏分至其莊發穀都計九萬餘石方啓倉
時學會令設櫃庭前有力者仍納金於櫃事竣啓視皆瓦石也止有金
八十兩大東卽以金修橋事聞詔給冠帶旌其門卒祀忠義祠從弟大
瀟亦以穀八千石助振守道旌其門曰厚積多施從子永弼亦助振四
千餘石時稱太平三義士崇禎時有永善者亦出穀請知縣湯執中設

法分振大東族子也。李志道困童子試改業醫遇貧乏不取藥資凡橋亭道路尤喜助捐歲饑里人採蕨薇以食量戶給粟全活無算時常平廣儲倉皆虛里豪以志道富戶報官同時呈義狀者二百餘人分守道金旌曰尚義良民

按道光府志載李志道元末明初人爲新甯籍分註一作武岡一作邵陽通志作鄧化今考其事蹟與縣志所載不類自是兩人特名偶同耳

蔡榮耀居隆回都建石

橋九郡北臨津渡隕岸欹險捐金貳之縣人彭克濟記其事卒年九十
八又易福重置武邵江義渡捐田二十餘畝 劉永發由掾考授崇德縣丞蒞事敏練旋棄官歸督子讀且耕劉故著族籍於學者數十人或
不循禮法輒裁之終其世無敢軼檢者末年以產讓兄卒年九十一
黃景臻嘗破產救人之急王進才據寶慶縣令某走依臻臻割宅居之

賊環搜室皆燼先是令寄金臻家臻爲窖之土令僕偵知竊匿之賊退發窖無有乃舉債償令頃之僕匿金出仍以畀令有廣西宦某憂歸道龍溪爲流寇刼自經死臻往禮葬之卿之印事繼母孝以善病習岐黃術視人病未嘗索值貧者更遺之湯藥有某生奇窘屈試輒爲具裝歲時餽遺相繼王嗣佑諸生佃某負租百餘石謀鬻妻子以償急反券且飲之金後佃日裕願完前負不受子道亦隸學有父風以醫術活人從不受謝又扈大賢蕭化我均施棺藥數十年大賢兩賓鄉飲道府旌其門國朝車泌書遭流寇之亂負父母走避山谷中侍護無間弟洛書早喪撫二孤如已子妹家中落迎歸養之著有心光堂集卒祀鄉賢李芬芳芳同乳生同補弟子員每出入必偕既老構書舍課子姪

讀書其中日垂釣江干得魚卽市酒同飲兄弟七人特相敦睦不入城市者四十餘年芬年九十六芳年九十二弟茆九歲通經史十六爲縣學生怡情詩酒著有兄弟萃和詩集小學衍義又譚世欽與弟世鎮亦同入學籍相友愛至九十歲 陳同文性溫和人或侮之不與校早失怙延師課弟篤友愛年七十餘行坐必偕 吳伯鏐諸生幼讀孝經曰爲子不當爾爾耶稍長供侍益謹居喪絕酒肉三載父沒有異母弟才四齡督養成之喜施濟生平全人骨肉贖子女甚多貧無依者收養之甚或竊財以逃置不問嘗語家人曰彼自負恩我實不忍豈容鑒此而不爲善也 姜經國幼喪父母事祖母孝養備至昆季友愛垂老不衰居鄉多義舉 歐陽明發父母皆早世明發事祖孝有所往輒攜杖偕

夜必祖臥始就寢或呻吟雖嚴冬必起視歷三十餘年不懈承祖志倡修會芳園義館置義田若干畝周雄盛家百餘口同爨未嘗闢詬諍聲嘗謂昆季緝諧間言不至陽城不娶亦賢者之過不足法也乾隆戊戌饑施穀無算申佐鼎以歲貢生授興甯訓導官十八年乞歸與弟佐任佐樞同居讀書終日不倦佐任佐樞皆學生嘗捐貲建義學鼎任年俱八十四樞年八十六鼎子廷灼亦以孝聞歐陽河府學生內行肫篤旣沂居季弟中落河膳養之治子弟甚整自奉刻苦拯貧困如不及年七十九卒楊舟諸生性孝授徒近鄰晨昏必歸省母母陳性嚴峻或不懌輒竟日臥舟引咎自責跪榻下奉盤盂以進必俟母食乃起無子以兄四秀次子暉吉嗣舟旋沒妻先卽世暉吉仍依本生母陳陳

早遭四秀之喪長子樂庵復殞慟甚暉吉更以次子嗣樂庵未幾喪偶母命續昏泣辭曰噴室之弊強半岬後婦恐轉貽母慮也卒不再娶性和厚有幹才自少因貧業賈艱苦勤瘁鮮適意而日潔菽水唯恐失歡忠敬延師課二子有成又爲諸從子謀職業倡修家譜調恤族黨時咸重其內行之篤云 劉達陽幼爲人牧隣有塾日止牖下聽講說塾師異之叩所聞了然曰承宮之流也語主人資之學學頓進里某延教其子遺以帳與絮不受旣乃偵知其母固無之也中歲隸學籍食餼仍授徒自給館距家里許每雞鳴趨候母安乃課弟子業雖雨雪無間分館穀奉業師竝周其子鄉試日有同里某染劇疾躬爲調護及卒經紀其喪甚至營買田耕有年原主藉祖墓撓之卽讓半俾護其墓以歲貢終

門人立主祀焉 羅積宓事繼母孝世父貧老無子積宓養之如父沒後置墓田以永其祀 李明祈友愛兄弟至老不忍異居有妹貧乏迎歸同居教養其子 羅再錫喜讀書兄弟終老不忍異居內外無詬詆亦無私積 李春臺精醫理窮民求診者輒與之藥不問其值途遠者酌時日增減爲方待之無不驗性孝友推產讓諸弟諸弟或貧更取給仍與之不厭 尹遠例貢生幼喪父事嫡母趙母申繼少懈伯兄卒撫孤如己出 彭素公弟死無後爲立嗣撫之如己出有妹遠嫁失所遣奴迎歸爲甥置產授室相依終身 甯世珩衛千總銜有弟多病將護之甚周嘗客武岡聞弟病篤夜馳歸馬逸誤入河旣乃躍起登岸得不死人以爲誠感弟死以其子後之 曾宗科事父母孝三兄俱無子弟

亦未娶宗科盡鬻其產爲兄納妾弟娶婦兄得生子 黃祖德兄早世撫遺孤成立家數世同居伯仲娣姒皆無私積嘗與族叔同賈頗得利叔死養其孤長乃分產予之 謝高玉仲兄卒撫孤子成立既子又死更爲立嗣教養之 劉鳳事父母飲食必親進兄早死事寡嫂謹撫遺孤成人嘗建亭施茶月朔集里人講鄉約人多化之 蕭代芸事母孝以兄子多分產讓之兄死撫諸姪如子嘗買李婦田已耕矣已聞李婦寡而貧竟還之 陳惟佑年三十鰥兄弟求析產惟佑盡推與之力耕養父母以貧故十年不娶後乃娶生子五人 鄭應周弟無賴盡蕩其產爲乞丐應周分子之踰時復盡更從諸丐遊如是再三應周乃陰置錢穀於鄰里家時時周之終其身 周維詩有弟早卒勤撫遺孤更分

產予之嘗於路得遺金俟其人至歸之 曾庭欽家富於財從子六人皆孤貧庭欽分給以產與已子均 歐陽傑父溪諸生性至孝父母有怒溪見卽解傑訓蒙爲業手輯鑒要十餘卷年四十始附學籍兄弟友愛以季子恪後其伯兄三子輯瑞後其季弟嗣長次子皆天傑竟無子 蕭良昌少貧有兄客滇中久無耗後家稍起乃裹糧往覓之久之不得貲將盡日夜涕泣目盡腫一日曉出迷失道見汲者就問則兄子也因共詣兄迎兄歸同居終老 梁興緝舉人學淹貫爲文清真雅正會試至京師聞父疾馳還久雨泥溝車行遲棄車徒步日行百餘里至家父已殮矣興緝哀痛自投於池家人救之得不死 蕭訓辭性孝姊適周氏周遊陝西久不歸母念之屢遣覓不得訓辭乃自往訪之與俱歸

爲置田宅 賀天武兄弟三人伯兄遊蜀會母生日上壽母愀然思伯天武卽迎歸之分產與伯後兩兄中落復與之 易成熙幼孤稍長見父遺物輒流涕事母孝性尤仁厚嘗購蕭姓田已署券哀其貧因復歸之 孫敏事母孝妻不潔膳出之躬爨以養終其身不娶撫兄子甚有恩冬夜聞鄰人號寒卽撤被予之市有因債鬻子者代償之不問姓名 趙耀昆幼孤事母孝母因哭夫及仲子喪明耀昆朝夕舐之久乃復明嘗奉母命捐水浸塘田十餘畝入資東書院 曾子珪幼孤以傭養母每朝出儲錢數十傭母日用母小不安子珪卽不出晚歸望見舍卽遙呼母每歸必市餅餌或蔬果奉母子珪雖傭母忘其貧鄰里富家乃更羨之 孫武哉幼孤貧母嫁遺幼弟武哉養成之後服賈陝西家稍